



UDRUŽENJE SLIJEPIH KANTONA SARAJEVO,
SARAJEVO, ul. Podgaj br.7, Tel/fax:033 445 185,
e-mail:usgks@bih.net.ba
www:slijepi - sa.org.ba

Broj: _____/15
Datum: _____ 2015.god.

IZVJEŠTAJ

O RADU UDRUŽENJA SLIJEPIH KANTONA SARAJEVO ZA 2014. GODINU

I - UVOD

Udruženje slijepih Kantona Sarajevo svoj rad i aktivnosti u 2014.godini, realizovalo je u skladu sa Programom rada i djelovanja Udruženja za 2014.godinu, koji je Skupština Udruženja usvojila 27.12.2013.godine.

Sve aktivnosti su se realizovale sa ambicijom da se u što većoj mjeri ostvare ciljevi Udruženja, koji su utvrđeni Statutom Udruženja.

Kanton Sarajevo je pružao određenu podršku Udruženju slijepih, naročito preko Ministarstva za rad, socijalnu politiku, raseljena lica i izbjeglice, koje je iz Budžeta Kantona Sarajevo sufinansiralo dio najosnovnijih troškova koji su potrebni za rad Stručne službe. Za sve programske aktivnosti sredstva su obezbjeđivana kroz razne projekte ili donacije od pravnih i fizičkih lica iz zemlje i inozemstva, uključujući i pomažuce članove, što je za sada jedini način finansiranja ovih aktivnosti.

Ekonomska kriza koja je zahvatila cijeli svijet, pa i Bosnu i Hercegovinu, a naročito politička kriza, prije svega u Federaciji i Kantonu Sarajevo, što je za posljedicu imalo nestabilne vlade, bitno je u 2014.godini otežavalo ostvarivanje osnovnih ciljeva Udruženja, uključujući i obezbjeđivanje nedostajućih sredstava za rad Stručne službe Udruženja, finansiranje režijskih troškova i finansijskih sredstava za realizaciju programskih aktivnosti Udruženja. Iz tih razloga Udruženje je pokušavalo samostalno ili u partnerstvu sa drugim nevladinim organizacijama aplicirati razne projekte, da bi se obezbijedila sredstva kako za osnovne režijske troškove Udruženja, tako i za provođenje programskih aktivnosti. Ipak, zahvaljujući dobro vodjenoj politici i domaćinskom poslovanju, može se za zadovoljstvom konstatovati da je rad Udruženja u 2014.godini bio uspješan, te da su realizovane skoro sve planirane aktivnosti.

I dalje postoji nedovoljno razumijevanje značaja i funkcije ovog Udruženja, te prednosti njegovog organizovanja na kantonalnom nivou, od strane većine opština udruženih u Kanton Sarajevo. Ovakav pristup od strane opština i opštinskih načelnika predstavlja problem sa kojim se Udruženje, nažalost, suočavalo i u 2014. godini, u ostvarivanju jednake zaštite slijepih osoba, te provodjenju istog nivoa podrške, na području svih opština udruženih u Kanton Sarajevo. Samo je općina Centar i u 2014. godini, u simboličnom iznosu, sufinansirala određene programske aktivnosti. Tendencija koja ima za cilj svrstavanje ovog i sličnih udruženja u one nevladine organizacije, koje se finansiraju samo iz projekata, stvara nepremostive prepreke i može dovesti do postepenog smanjivanja aktivnosti Udruženja, što bi za slijepe osobe imalo nesagledive posljedice.

U nastavku izvještaja, ukratko ćemo objasniti najvažnije aktivnosti koje su realizovane u 2014. godini, te istaći određene probleme sa kojima su se slijepe osobe i ovo Udruženje susretali.

II - OTKRIVANJE, UČLANJIVANJE I POMOĆ NOVOPRIMLJENIM ČLANOVIMA

Otkrivanju slijepih osoba i pružanju raznih vidova pomoći novooslijepjelim osobama, posvećivana je posebna pažnja, s ciljem da se otkriju i u Udruženje učlane svi građani Kantona Sarajevo, čije se stanje vida uklapa u definiciju sljepoće i kojima je objektivno potrebna pomoć i podrška ovog Udruženja.

U Udruženje je u 2014. godini primljeno 17 novih članova, a na dan 31.12.2014. godine Udruženje je na evidenciji imalo 426 članova.

Udruženje je na razne načine, u cilju ostvarivanja određenih prava i beneficija za svoje članove, uputilo na preglede 25 osoba, što je rezultiralo prijemom članova u Udruženje i obezbjedjivanju određenih tiflotehničkih pomagala ili drugih prava koja se ostvaruju po osnovu sljepoće.

Novoprimljenim i ostalim članovima pružana je neophodna pomoć pri ostvarivanju određenih prava, a Udruženje je u skladu sa svojim mogućnostima svim zainteresiranim, besplatno dodjeljivalo pomagala i omogućilo im da pohađaju razne kurseve, prema iskazanom interesovanju.

Posebna pažnja posvećena je pružanju psihosocijalne podrške, obuci za samostalno kretanje uz korištenje bijelog štapa i samostalno obavljanje svakodnevnih aktivnosti, o čemu će se detaljnije govoriti u narednim poglavljima.

Ovdje treba naglasiti da za ove oblike edukacije i podrške, od strane slijepih osoba, postoji veliki interes, ali da su ove aktivnosti ograničene mogućnošću obezbjedjivanja finansijskih sredstava od strane državnih institucija i donatora.

III – ZAŠTITA SLIJEPIH I UNAPREDJENJE NJIHOVIH PRAVA

U toku 2014.godine u Bosni i Hercegovini pokušavano je provođenje određenih reformi, posebno u sektorima od interesa za osobe sa invaliditetom kao što su: oblast zdravstva, socijalne zaštite, te u oblasti rada i zapošljavanja. U svim ovim pokušajima pitanjima sljepoće i invalidnosti nije pridavan adekvatan značaj, pa je s toga ovo udruženje u saradnji sa drugim organizacijama osoba sa invaliditetom, činilo sve da bar očuva postojeći status i dostignuta prava osoba sa invaliditetom, u čemu se u dobroj mjeri uspjelo. Opša politička situacija u Bosni i Hercegovini, nestabilne vlade na svim nivoima, i ne postojanje jasnih opredjeljenja za stvaranje društva jednakih mogućnosti, bitno je otežalo ukupan rad i djelovanje ovog udruženja.

Vlada Federacije i Parlament Federacije usvojili su Strategiju za izjednačavanje mogućnosti za osobe sa invaliditetom u Federaciji BiH, kojom se utvrđuju pravci daljnjeg djelovanja u oblasti invalidnosti, na svim nivoima vlasti, sa posebnim akcentom na djelovanje vlasti u lokalnoj zajednici.

Bez obzira na određene pokušaje od strane Federalnog ministarstva za rad i socijalnu politiku da se ova Strategija promoviše, generalno se može reći, da ni jedna od bitnih obaveza iz ove Strategije još uvijek nije realizovana, kako na Federalnom, tako i na nivou Kantona Sarajevo.

Vlada Federacije je krajem 2013.godine, pod pritiskom organizacija osoba sa invaliditetom, konačno donijela Odluku o formiranju Ureda za osobe sa invaliditetom. Iako je očekivano da ovaj Ured počne i praktično raditi 2014.godine, to se ipak, nije desilo, što najilustrativnije govori kakav je odnos vlasti prema pitanjima od interesa za osobe sa invaliditetom.

Već tri godine priprema se Akcioni plan za implementaciju ove Strategije u Kantonu Sarajevo, u čiju se izradu i pregovore sa predstavnicima vlasti aktivno uključivao izvršni direktor ovog udruženja, koji je i predsjednik Koordinacionog odbora udruženja osoba sa invaliditetom Kantona Sarajevo. Zbog čestih promjena sastava Vlade Kantona Sarajevo, ova aktivnost još nije završena. U decembru 2014.godine konačno je formulisana Nacrt Akcionog plana, pa će u narednih nekoliko mjeseci slijediti usaglašavanje sa institucijama vlasti.

Vlada Federacije je u prvoj polovini 2013.godine odlučila da Udruženju slijepih Kantona Sarajevo povjeri provođenje aktivnosti na implementaciji Strategije za izjednačavanje mogućnosti za osobe sa invaliditetom, kroz izradu lokalnih akcionih planova i provođenja raznih oblika edukacije, u 5 kantona, uključujući i Kanton Sarajevo. Ova aktivnost u 2014.godini proširena je na svih 10 kantona, čime se na neki način jača pokret OSI u F BiH. Do kraja 2014.godine urađeno je inoviranje nacrt lokalnih akcionih planova, u kojima su utvrđeni prioriteti. Za očekivati je da će ovi dokumenti, u 8 kantona, ući u formalnu proceduru usvajanja početkom 2015.godine.

Redovno se pratila implementacija Zakona o profesionalnoj rehabilitaciji, osposobljavanju i zapošljavanju osoba sa invaliditetom u F BiH. Ovaj zakon je od posebnog interesa za slijepe osobe, pa smo zainteresirani da slabosti u njegovoj primjeni svedemo na minimum. S obzirom da ranije izmjene i dopune nisu prošle parlamentarnu proceduru, jer su na zahtjev nekih udruženja OSI povučene, Udruženje je intenzivno radilo na formulisaniu određenih principa za izmjenu i dopunu ovog Zakona

Pod pritiskom Svjetske banke i Međunarodnog monetarnog fonda na posebnom udaru su izdvajanja u socijalnom sektoru. Promjenom zakona i drugih propisa žele se smanjiti socijalna davanja i davanja koja se odnose na podršku osobama sa invaliditetom i time se stabilizirati budžeti na svim nivoima državne vlasti. Ovim se želi teret krize, u najvećoj mjeri, prebaciti na najugroženije grupe tj. na osobe sa invaliditetom i time ih dovesti u još teži položaj, što je u stvari još jedan oblik diskriminacije osoba sa invaliditetom. Za slijepe osobe i druge osobe sa invaliditetom, želi se uvesti prihodovni ili neki drugi cenzus, koji bi bio uslov za ostvarivanje određenih prava i beneficija po osnovu invaliditeta, iako se ovdje radi o podršci za funkcionisanje i stvaranje jednakih mogućnosti.

Da bi se ovo spriječilo ili bar proces usporio, tokom cijele 2014.godine, aktivisti iz Udruženja slijepih Kantona Sarajevo su učestvovali u raznim komisijama i grupama, na konferencijama i okruglim stolovima, razgovarali sa predstavnicima međunarodne zajednice i predstavnicima nevladinih organizacija. Željeli smo postići da se kreiranje zakona i drugih propisa temelji na Konvenciji o pravima osoba sa invaliditetom i Jedinствenoj politici u oblasti invalidnosti i time obezbijediti da osobe sa invaliditetom zadrže postojeća prava i podršku, a da se u formulisanju prava za osobe sa najtežim invaliditetom podrška utvrđuje prema stvarnim potrebama. Uprkos tome Vlada Federacije BiH je poslala u parlamentarnu proceduru Zakon o jedinstvenim načelima i okviru materijalne podrške za osobe sa invaliditetom, u kome je zadržan prihodovni cenzus, na ličnu invalidninu. Značajnim angažmanom predstavnika i ovog udruženja, na parlamentarnim odborima i komisijama, pa i na samom zasjedanju zastupničkog Doma F BiH, uspio se izboriti zaključak u kome se Vlada Federacije zadužuje da u prijedlogu Zakona ne ugrađuje prihodovni cenzus.

Za očekivati je da će se i u 2015.godini pripremati i puštati u parlamentarnu proceduru razni reformski zakoni, u kojima će se pokušavati ukidati ili umanjivati prava OSI, pa i slijepih osoba, što organizacijama osoba sa invaliditetom nalaže organizovano i zajedničko djelovanje, kako se dostignuta prava ne bi ugrozila.

Djelujući kroz Koordinacioni odbor udruženja osoba sa invaliditetom Kantona Sarajevo i mrežu koalicija OSI u BiH, predstavnici ovog udruženja su znatno doprinjeli jačanju kapaciteta organizacija OSI i pokreta osoba sa invaliditetom.

Udruženje je aktivno radilo na tome da Ministarstvo zdravlja Kantona Sarajevo utvrdi povoljnije uvjete za ostvarivanje prava na tiflotehnička i druga pomagala. Nažalost, ovdje nisu postignuti bilo kakvi rezultati jer Ministarstvo zdravlja Kantona Sarajevo, nema razumijevanja za probleme sa kojima se, u ovoj oblasti, susreću slijepe osobe.

Proučavani su i drugi propisi od interesa za slijepe osobe, s ciljem da se obezbijedi zaštita postojećih prava i statusa slijepih osoba, te da se gdje je to moguće, obezbijedi i njihova bolja zaštita, kao što su Zakon o zdravstvenom osiguranju, Zakon o igrama na sreću, Zakon o zabrani diskriminacije, te mnogi drugi podzakonski akti.

U kreiranju novih propisa, kako na nivou Kantona, tako i na nivou Federacije, aktivno su učestvovali predstavnici Udruženja slijepih Kantona Sarajevo. U okviru implementacije projekta „IN“ – implementacija Konvencije o pravima osoba sa invaliditetom u zakonodavstvu BiH, koji Udruženje realizuje sa Helsinškim parlamentom građana iz Banjaluke i još tri organizacije osoba sa invaliditetom, aktivno se radi na analizi postojećeg stanja i mogućim promjenama u zakonodavstvu BiH.

Aktivnost prema nadležnim državnim organima Udruženje je vodilo neposredno i preko Saveza slijepih Federacije BiH ili zajedno sa drugim sličnim udruženjima preko Koordinacionog odbora koji djeluju na nivou Kantona Sarajevo i Federacije Bosne i Hercegovine, te sa drugim nevladinim organizacijama.

Osim navedenog u 2014. godini Udruženje slijepih Kantona Sarajevo se posebno angažovalo na sljedećim zadacima:

- pružana je tehnička i druga pomoć članovima Udruženja pri ostvarivanju prava i beneficija koje imaju po zakonima i drugim propisima;
- tokom cijele godine predstavnici Udruženja su vršili pregovore sa Ministarstvom zdravstva Kantona Sarajevo i upućivali pismene i usmene prijedloge za izmjene i dopune Uredbe o ortopedskim i drugim pomagalima u Kantonu Sarajevo;
- Nakon pregovora sa predstavnicima GRAS-a i nadležnih ministarstava u Kantonu Sarajevo, zaključeno je da se karte za prevoz slijepih osoba u vozilima GRAS-a, za 2014.godinu neće izdavati, zbog situacije koja je nastala u GRAS-u, ali je dogovoreno da karte iz 2012.godine važe i u 2014.godini, o čemu je Ministarstvo saobraćaja Kantona Sarajevo i zvanično obavijestilo Udruženje. Krajem 2014.godine postignut je dogovor sa GRAS-om i nadležnim ministarstvom da se izdaju nove karte za prevoz u 2015.godini, po ranije dogovorenoj proceduri.
- Članovima su pružani razni oblici pomoći, naročito na rješavanju njihovih statusnih pitanja;
- Članovima Udruženja su izdavane razne potvrde, davana uputstva i pružana stručna pomoć u cilju što efikasnijeg ostvarivanja raznih prava i beneficija koje imaju slijepe osobe.

IV – STVARANJE USLOVA I MOGUĆNOSTI ZA OBRAZOVANJE, SOCIJALNU INTEGRACIJU, OSPOSOBLJAVANJE, ZAPOŠLJAVANJE I UKLJUČIVANJE ČLANOVA U RAD UDRUŽENJA

Oblast koja se odnosi na rehabilitaciju, resocijalizaciju, školovanje i zapošljavanje slijepih ima poseban značaj za slijepe osobe, jer se rješavanjem ovih pitanja rješavaju i egzistencijalna pitanja slijepih osoba i povećava se njihova socijalna uključenost. Nažalost, zbog opšte ekonomske i političke situacije u kojoj se nalazila Bosna i Hercegovina u 2014.godini, nisu učinjeni značajni pomaci naročito kada se radi o socijalnoj i profesionalnoj rehabilitaciji, ali su ipak određeni rezultati postignuti u oblasti zapošljavanja, naročito sa usvajanjem Zakona o profesionalnoj rehabilitaciji, osposobljavanju i zapošljavanju osoba sa invaliditetom i povećanjem aktivnosti Fonda za profesionalnu rehabilitaciju i zapošljavanje osoba sa invaliditetom u F BiH.

Zahvaljujući podsticajnim mjerama i implementaciji Zakona o profesionalnoj, rehabilitaciji, osposobljavanju i zapošljavanju osoba sa invaliditetom u F BiH, tokom 2014.godine, zaposleno je na neodređeno i određeno vrijeme, te pokretanjem sopstvenog biznisa radni status je riješilo 10 slijepih osoba.

Ako se uzme u obzir ukupna situacija u Kantonu Sarajevo, sa postignutim rezultatima se može biti zadovoljno, iako određeni broj slijepih osoba čeka na zaposlenje.

Očekujemo da će se daljnjom implementacijom Zakona o zapošljavanju, u budućnosti, bitno unaprijediti zapošljavanje slijepih osoba.

Realizacijom raznih projekata, kao što su: Projekat koji je preko Saveza slijepih Štokholm i Gotland Len, finansirao MyRight iz Švedske, projekta „IN“, Federalnog programa za implementaciju Strategije za izjednačavanje mogućnosti za osobe sa invaliditetom 2011 – 2015.godina, te realizacijom drugih manjih projekata, kao i programi/projekti koji su realizovani sa preduzećem za zapošljavanje slijepih „TMP“ u toku 2014. godine uradjeno je sljedeće:

Provođene su aktivnosti u vezi sa razvojem sistema rehabilitacije u Kantonu Sarajevo, u skladu sa „Programom rada i djelovanja Udruženja slijepih Kantona Sarajevo na podsticanju i razvoju rehabilitacije, zapošljavanja i edukacije slijepih i slabovidnih osoba u Kantonu Sarajevo“;

Sve aktivnosti su bile usmjerene prema slijepim osobama, članovima ovog udruženja, kako bi se u što većoj mjeri uključile u procese rehabilitacije, edukacije i sticanja raznih vještina, radi povećanja njihove socijalne uključenosti.

Aktivnosti su takodjer usmjeravane prema državnim strukturama, prije svega nadležnim ministarstvima, stručnim institucijama i centru za socijalni rad koji bi u budućnosti trebali obezbijediti, formalne, materijalne i druge pretpostavke za uspostavljanje i funkcionisanje sistema socijalne i profesionalne rehabilitacije i zapošljavanja slijepih osoba.

U saradnji sa drugim organizacijama osoba sa invaliditetom, tokom 2014.godine, vodjena je vrlo intenzivna kampanja za organizovanje servisa za podršku osobama sa invaliditetom u lokalnoj zajednici.

U nastavku ovog izvještaja daćemo kratak pregled ključnih aktivnosti koje je Udruženje realizovalo u toku 2014.godine, a koje su imale za cilj podizanje personalnih kapaciteta članova Udruženja:

1. – Psihosocijalna podrška

Osnovna/bazna rehabilitacija i psihosocijalna podrška slijepih osoba, članova Udruženja, pružana je tokom cijele godine.

Procesom rehabilitacije je obuhvaćeno 30 slijepih osoba.

Rehabilitacija – psihosocijalna podrška je organizovana u Udruženju slijepih ili u porodici osobe sa kojom se provodi rehabilitacija, u prirodi, sportskim terenima i bazenima.

Radjena je psihosocijalna podrška slijepih osoba i njihovih porodica, obavljanje osnovnih dnevnih aktivnosti, osnovni mobilitet u zatvorenom prostoru, podrška za

uključivanje u rad Udruženja i lokalnu zajednicu, ohrabrivanje za što samostalniji život, koordinacija pokreta, držanje tijela, te druge aktivnosti u skladu sa konkretnom situacijom u kojoj se nalazi slijepa osoba i njena porodica.

Odredjeni oblici psihosocijalne podrške pružani su članovima na zajedničkim druženjima i sastancima, te kroz aktivnosti Sportskog društva slijepih.

2. Edukacija članova za mobilitet i svakodnevni život i korištenje bijelog štapa (OK)

Obuci za mobilitet slijepih u 2013.godini pristupalo se u skladu sa utvrđenim planom i iskazanim interesom za ovaj oblik edukacije . Cilj je bio da se što više slijepih osoba pripremi za uključivanje u proces praktične obuke za samostalno kretanje , uz korištenje bijelog štapa. Bez prethodne pripreme slijepa osoba i članova njene porodice nije bilo moguće otpočeti ovaj oblik edukacije. Razni oblici psihosocijalne podrške kontakti sa članovima i njihovim porodicama , razgovori koji su vodjeni u Udruženju i u samoj porodici , dali su, po našem mišljenju , veoma dobre rezultate. Bez obzira na predrasude , kako samih slijepih osoba, tako i njihovih porodica, a uzimajući u obzir i otežane uslove za kretanje ulicama grada zbog arhitektonskih prepreka i pojave velikog broja pasa lualica, ipak, angažman je dao određene rezultate.

Tokom cijele godine, kada su god to vremenski uvjeti dozvoljavali, organizovana je obuka za mobilitet, obuhvaćeno je 5 osoba, rad je bio individualan. Dva instruktora mobiliteta obučavali su članove Udruženja samostalnom kretanju uz korištenje bijelog štapa. Polaznici kursa savladali su osnovne vještine korištenja bijelog štapa i savladali samostalno kretanje na uobičajenim relacijama kojima se svakodnevno kreću.

U izvještajnom periodu nastavljena je saradnja sa Ministarstvom za saobraćaj Kantona Sarajevo. Ova saradnja rezultirala je produženjem projekta ozvučenja semafora na ključnim raskrsnicama.

Takodjer je radjeno i na projektu koji ima za cilj da se u javnom gradskom prevozu obezbijedi zvučno najavljivanje stanica, što bi slijepim osobama olakšalo samostalno korištenje javnog gradskog prevoza.

3. – Kursevi kompjutera

Tokom cijele godine organizovani su kursevi za obuku slijepih za rad na kompjuterima. Obuhvaćeno je 5 osoba. Rad je bio individualan. 4 od 5 obuhvaćenih osoba prvi put su počeli raditi na kompjuteru i uspjeli su da savladaju osnovne procedure korištenja kompjutera, koji im omogućuju korištenje tastature, rad u Wordu, korištenje e-maila i korištenje interneta i Skype. Bila su angažovana 3 instruktora koja su ranije stekla znanja u okviru edukacija koje je organizovalo Udruženje.

Edukacija je organizovana u kompjuterskom centru Udruženja, a povremeno i kod kuće slijepe osobe, ako je bilo potrebno, što podrazumijeva i instalaciju određenih programa, koje slijepe osobe same nisu mogle instalirati.

Nastavljen je ranije započeti oblik edukacije slijepih osoba, preko interneta, „učenje na daljinu“ (on line). U ovaj oblik edukacije uključuju su se one slijepe osobe koje su savladale osnovne vještine korištenja kompjutera, kroz kurseve koji su organizovani u Udruženju i „TPM“-u.

4. – Kursevi engleskog jezika

U drugoj polovini 2014.godine organizovan je tromjesečni kurs engleskog jezika, u ukupnom trajanju 50 sati. Kurs je umjesto 8 pohađalo 4 osobe, o čemu je postignut dogovor sa SRF-om. Razlog smanjenja broja polaznika su objektivne okolnosti u Sarajevu, koje se odnose na transport i usklađivanje vremena i obaveza planiranih osoba. Drugi članovi koji su se željeli uključiti na ovaj kurs bili su početnici, što se nije moglo uklopiti, jer je ovaj kurs planiran kao napredniji. Angažovan je jedan profesor engleskog jezika. Najviše pažnje posvećeno je konverzaciji i analizi međunarodnih dokumenta koja se odnose na ljudska prava osoba sa invaliditetom.

Na ovaj način se željelo da polaznici što više nauče terminologiju koja se koristi u oblasti invaliditeta.

Za potrebe kursa pripremani su materijali na Brajevom pismu i uvećanom tisku.

5. – Seminar za fizioterapeute

U junu mjesecu organizovan je dvodnevni seminar za fizioterapeute. Na seminaru je učestvovalo 10 fizioterapeuta. Na ovom seminaru dva predavača, od kojih je jedan profesor na univerzitetu u Sarajevu, prezentirali su učesnicima nova znanja i vještine u oblasti fizioterapije, kao i vještine sa kojima se fizioterapeuti u BiH nisu susretali. Osim teoretskog dijela značajna pažnja je posvećena i praktičnim vježbama. Jedna od važnih tema bila je “Govor tijela”, “Držanje tijela”, “Vježbanje pokreta”, što je veoma važno za slijepe osobe. Na usmenoj evaluaciji, kojoj su prisustvovali i predstavnici Udruženja, polaznici su sa oduševljenjem govorili o novim saznanjima, te izrazili želju da se i u buduću nastavi ovaj vid edukacije.

6. Obuka slijepih osoba za pisanje i vođenje projekata

U toku 2014.godine organizovana su tri dvodnevna treninga “pisanja i vođenja projekata”, s ciljem da se polaznici obuču za trenere ili ko-trenere, koji će u buduću moći voditi treninge iz navedene oblasti. Ovo se prije svega odnosi na treninge koji će se organizovati u okviru udruženja slijepih u Federaciji BiH, a moguće je i u drugim organizacijama osoba sa invaliditetom. Ove treninge je pohađalo 10 osoba, koji su na kraju godine dobili certificate.

Uslov za pohađanje ovog treninga bio je da su kandidati prošli prethodne faze treninga, koji su organizovani u periodu 2011-2013.godina. Za sve učesnike treninga obezbjeđeni su materijali u pristupačnom formatu, uključujući i Priručnik za trenere, na Brajevom pismu i zvučnom format.

Ove treninge vodio je certificirani trener, profesor na Ekonomskom fakultetu Univerziteta u Sarajevu koji je vodio mnoge treninge u vladinom i nevladinom sektoru. Ovdje treba istaći da je uz glavnog trenera bio angažovan i ko-trener, iz reda polaznika treninga, što je poslužilo kao dobra praksa i ohrabrivanje samih učesnika da se aktivnije uključe u ove procese.

7. Obuka slijepih osoba za zagovaranje i vodjenje javnih kampanja

Tokom 2014.godine organizovana su tri dvodnevna treninga javnog zagovaranja i organizovanja javnih kampanja, koji su imali za cilj da se polaznici treninga obuče za trenere ili ko-trenere, koji će u budućnosti moći voditi treninge u navedenim oblastima. Ovo se prije svega misli na treninge koji se organizuju u okviru udruženja slijepih u Federaciji BiH, a moguće i u drugim organizacijama osoba sa invaliditetom. Trening je pohađalo 12 osoba, kojima su na kraju godine uručeni certifikati. Uslov za pohađanje ovog treninga bio je da su kandidati prošli prethodne faze treninga, koji su organizovani u periodu 2011-2013.godina. Za sve učesnike treninga obezbjeđeni su materijali u pristupačnom formatu, a na kraju je Priručnik za trenere odštampan na Brajevom pismu i snimljen na CD, u MP3 formatu. Ove treninge vodio je certificirani trener, koji je napisao i priručnik za javno zagovaranje, a vodio je mnoge treninge u vladinom i nevladinom sektoru. Ovdje treba posebno istaći da je uz glavnog trenera bio angažovan i ko-trener, iz reda polaznika treninga, što je poslužilo kao dobra praksa i ohrabrivanje samih učesnika da se aktivnije uključe u ove procese

8. Učešće u Nacionalnom programu MyRight

Udruženje slijepih je aktivno uključeno u realizaciju Nacionalnog programa u BiH MyRight. Predstavnik Udruženja je član program tima i aktivno učestvuje u njegovom radu. Sve projektne i programske aktivnosti Udruženja usaglašavaju se sa aktivnostima u okviru Nacionalnog programa, što se ostvaruje dobrom saradnjom između odgovornih osoba u Udruženju i nacionalnog koordinatora MyRight.

Članovi Udruženja učestvovali su u svim aktivnostima koje su organizovane u okviru Nacionalnog programa, naročito na onima koje se odnose na edukacije. Ciljevi koji su bili postavljeni kroz Projekat i ciljevi u okviru Nacionalnog programa su komplementarni i usklađeni su sa ciljevima MyRight i SIDA.

Predstavnici Udruženja, koji su bili uključeni u realizaciju drugih projekata ili programa, kao i u radu sa organizacijama OSI i institucijama vlasti, promovisali su principe MyRight i SIDA i pokušavali su da aktivnosti u tim projektima i postignutim rezultati, budu kompatibilni sa rezultatima koji se postižu kroz Nacionalni program MyRight u BiH. Ova aktivnost je za Udruženje veoma važna jer SRF iz Švedske ima poseban interes da se nacionalni program u

BiH razvija, te da naši projekti i programske aktivnosti budu uskladjene sa principima na kojima insistira SIDA i MyRight.

9. Realizacija Federalnog programa za implementaciju Strategije za izjednačavanje mogućnosti za osobe sa invaliditetom

Vlada Federacije Bosne i Hercegovine povjerila je Udruženju slijepih Kantona Sarajevo da kao koordinator, na nivou Federacije i lider na nivou Kantona Sarajevo implementira Program „Podrška izrade lokalnih akcionih planova za implementaciju Strategije za izjednačavanje mogućnosti za osobe sa invaliditetom u Federaciji BiH 2011. – 2015.“. U skladu sa prihvaćenim programom i potpisanim protokolom Udruženje je organizovalo potrebne edukacije, sastanke i okrugle stolove i pružalo podršku za pripremu i usvajanje lokalnih akcionih planova u 10 kantona Federacije Bosne i Hercegovine. Ovaj program će se završiti do kraja prvog polugodišta 2015.godine.

10. Priručnici i drugi materijali pripremani u formatima pristupačnim za slijepe

Tokom 2014.godine, u cilju olakšavanja učešća članova Udruženja u procesima rehabilitacije i edukacije i provođenja drugih programskih i projektnih aktivnosti, pripremani su materijali na crnom tisku, printani na Brajevom pismu ili snimani na nosače zvuka. Zahvaljujući ovakvom pristupu bitno je olakšano učešće slijepih osoba u ovim aktivnostima.

Štampani su svi materijali za potrebe kursa engleskog jezika, kao i za edukacije pisanje projekata i javno zagovaranje. Također su na Brajevom pismu i zvučnoj tehnici pripremani materijali za međunarodnu konferenciju slijepih. U toku 2014.godine na Brajevom pismu i u zvučnom formatu pripremljeni su:

- 1) Alternativni izvještaj o primjeni Konvencije o pravima osoba sa invaliditetom u BiH;
- 2) Priručnik za trenere, koji će se koristiti pri organizovanju treninga u organizacijama slijepih u Federaciji BiH.

11. Saradnja sa „TMP“-om

Saradnja sa TMP-om u 2014.godini bila je izuzetno dobra i tokom godine realizovano je više zajedničkih projekata i programa, tako na primjer:

- Kroz Program Federalnog zavoda za zapošljavanje „Sticanje prvog radnog iskustva“ zaposlen je na 6 mjeseci jedan fizioterapeut, da obavi obavezni pripravnički staž, nakon čega će moći da konkuriše na sve oglase i konkurse za radno mjesto fizioterapeuta;
- Sa istom svrhom kroz Program Službe za zapošljavanje Kantona Sarajevo 800+ zaposlena je jedna fizioterapeutkinja, također, na 6 mjeseci;
- Kroz Program profesionalne rehabilitacije „Radno osposobljavanje slijepih i drugih osoba sa invaliditetom kroz radno angažovanje, usavršavanje radnih sposobnosti do zaposlenja, a u cilju veće konkurentnosti na tržištu rada“ koji je realiziran uz finansijsku potporu Fonda za profesionalnu rehabilitaciju i zapošljavanje osoba sa

invaliditetom, na godinu dana zaposlene su 3 osobe sa svrhom da se sveobuhvatno sagledaju njihove radne sposobnosti, procijeni mogućnost dokvalifikacije u okviru već stečenog zanimanja ili prekvalifikacije za neko drugo zanimanje pri čemu obavezno stiču nova znanja i vještine;

- Kroz tromjesečnu obuku tri osobe su pohađale kurs Engleskog jezika, sa ciljem unapređenja nivoa znanja radi uspješnog korištenja informacijsko-komunikacijskih tehnologija.

Udruženje je značajan broj svojih aktivnosti , a naročito onih koje se odnose na edukaciju i održavanje većih skupova / sastanaka, organizovalo u multimedijalnoj sali „TMP“-a.

V – POTREBE KOJE SLIJEPE OSOBE ZADOVOLJAVAJU NA SPECIFIČAN NAČIN

Gubitak ili teže oštećenje vida određuju uslove življenja i način zadovoljavanja odgovarajućih potreba. Te specifičnosti prije svega odnose se na mogućnost kretanja, korištenje tiflotehničkih i drugih pomagala, upotrebu Brajevog pisma, te zadovoljavanje potreba iz oblasti kulture, informisanja, sporta i rekreacije.

a) Obezbjedjenje tiflotehničkih pomagala

U svakodnevnom životu i radu slijepih osoba, tiflotehnička i druga pomagala imaju vrlo važnu ulogu, jer u određenim situacijama, makar djelimično, nadomješćuju izgubljeni ili teško oštećeni vid, odnosno njegovu funkciju.

Cijeneći izuzetan značaj pomagala za slijepe osobe i tokom 2014.godine Udruženje je ulagalo maksimalan napor da nadležne organe u Kantonu Sarajevo, humanitarne organizacije iz zemlje i inozemstva i asocijacije slijepih u svijetu, informiše o postojećoj situaciji, kako bi se bar djelimično ublažila vrlo teška situacija ,u ovoj oblasti , za slijepe osobe.

Od nadležnih ministarstava u Kantonu Sarajevo i Federacije BiH, kontinuirano se traži da se pitanje pomagala za slijepe osobe riješe zakonima i drugim propisima, s ciljem da im se omogući dobijanje bar najosnovnijih pomagala. Nažalost, u ovoj oblasti nisu postignuti značajniji rezultati, jer u Ministarstvu zdravstva Kantona Sarajevo i Fondu zdravstvenog osiguranja ne nailazimo na razumijevanje.

Opšte je poznato da je donacije svake godine sve teže obezbijediti, kako u zemlji , tako i u inozemstvu, ipak je Udruženje u 2014. godini, kroz razne projekte i od donatora iz zemlje i inozemstva uspjelo obezbijediti određenu količinu pomagala kao što su: Brajeve mašine, govorni programi, diktafoni, specijalni papir za pisanje Brajevog pisma, CD-ovi, bijeli štapovi, te druga sitnija pomagala, u vrijednosti: cca 10.000,00 KM.

Članovima su dodjeljivana i razna druga pomagala koja je Udruženje imalo na svojim zalihama.

Zbog teškoća pri nabavci pomagala Udruženje je vršilo popravku i reparaciju korištenih pomagala , naročito bijelih štapova i Brajevih pisanih mašina.

b) Informisanje

I tokom 2014. godine značajna pažnja posvećivana je informisanju članova Udruženja o svim pitanjima vezanim za rad Udruženja, pa i šire.

Redovno su izdavane, jednom mjesečno, "Zvučne novine", na CD-u, u MP3 formatu. Prosječan tiraž „Zvučnih novina“ u 2014.godini bio je 270 primjeraka. Osim članovima Udruženja časopis se slao i širom Bosne i Hercegovine, a određeni broj primjeraka slao se i slijepim osobama koje žive u Hrvatskoj i Srbiji i Crnoj Gori, te drugim evropskim zemljama u kojima žive iseljenici iz Bosne i Hercegovine.

„Zvučne novine“ i druge publikacije se snimaju, montiraju i kopiraju u tonskom studiju Udruženja.

Izdavanje „Zvučnih novina“ u 2014. godini sufinansirao je Grad Sarajevo, bez čije podrške ovaj časopis ne bi mogao izlaziti.

Nažalost, do sada ni jedan donator nije prihvatio projekat kojim bi se obezbijedilo finansiranje izdavanja časopisa na Brajevom pismu, koji bi mogao izlaziti mjesečno ili kvartalno.

I tokom 2014. godine insistirano je kod nadležnih organa u Kantonu Sarajevo da se finansiranje informativne djelatnosti za slijepe riješi zakonom ili drugim propisom, te da se potrebna sredstva obezbijede u Budžetu Kantona Sarajevo.

Jedno od važnih pitanja na kojem je Udruženje radilo, tokom 2014.godine je saradnja sa farmaceutskim kućama u vezi ispisivanja naziva lijekova na Brajevom pismu. Uz tehničku pomoć Udruženja, sve veći broj farmaceutskih kuća, koje proizvode ili distribuiraju lijekove u BiH, naziv lijeka ispisuju na Brajevom pismu, što je od neprocjenjive praktične koristi za slijepe osobe.

VI-ORGANIZOVANJE KONFERENCIJA, OKRUGLIH STOLOVA I PREDAVANJA

- a) U toku 2014. godine organizovana su dva okrugla stola, sa članovima Udruženja slijepih Kantona Sarajevo. U radu ovih okruglih stolova učestvovalo oko 70 članova Udruženja. 8 predavača i 2 moderatora, koji su članovi Udruženja, pripremali su uvodna predavanja. Prisutni članovi su aktivno učestvovali u raspravi.

Na ovim okruglim stolovima osnovna tema je bila "Konvencija o pravima osoba sa invaliditetom, mogućnosti korištenja Alternativnog izvještaja o primjeni Konvencije u procesu za zagovaranje prava slijepih osoba".

Obrađivane su sljedeće oblasti:

- „Analiza članova Konvencije u kojima su na jasan način specificirane obaveze države prema slijepim osobama“;
- „Mogućnosti korištenja Alternativnog izvještaja o primjeni Konvencije o pravima OSI, kao alata za zagovaranje prava slijepih osoba“;

- „Usklađenost Nacrta Zakona o jedinstvenim načelima i okviru materijalne podrške lica sa invaliditetom u Federaciji BiH sa CRPD”;

- „ Analiza javne rasprave o Nacrtu Statuta Udruženja slijepih KS ;

- „ Konvencija o pravima osoba sa invaliditetom kao polazni dokument u zagovaranju prava slijepih“;

-“Reforma socijalnog sektora, usklađenost sa Konvencijom i položaj slijepih osoba u tom procesu

-„ Uloga Udruženja u implementaciji Konvencije kroz izradu programa rada za 2015. godinu;

Teme obrađivane na ovim okruglim stolovima, članovi Udruženja su diskutovali na drugim skupovima, koji su u okviru Udruženja organizovani, sa predstavnicima institucija vlasti, a ne rijetko i u sredstvima informisanja. Povećan je interes članova da se uključe u aktivnosti Udruženja, kao i interes da se detaljnije bave međunarodnim i domaćim dokumentima, koji se odnose na ljudska prava. Ono što posebno treba istaći je podizanje svijesti o značaju i ulozi Udruženja, što je rezultiralo i usvajanjem novog Statuta Udruženja u decembru 2014.godine.

b) U decembru 2014.godine organizovan je okrugli sto sa predstavnicima institucija vlasti i političarima, na kome se diskutovalo o pravima slijepih osoba, o Konvenciji i Alternativnom izvještaju i građenju partnerskih odnosa Udruženja sa institucijama vlasti. Na okruglom stolu su bile prisutne 23 osobe i to 11 predstavnika Udruženja i 12 predstavnika institucija vlasti, sa federalnog, kantonalnog i općinskog nivoa. Na ovom okruglom stolu su između ostalih , prisustvovali i aktivno učestvovali u radu ministar za rad i socijalnu politiku Kantona Sarajevo, pomoćnik ministra za rad i socijalnu politiku Kantona Sarajevo, pomoćnik federalnog ministra za rad i socijalnu politiku, predstavnici drugih ministarstava, predstavnici općine i dr. Iako se radi o periodu u kome još nije konstituisana vlast , ipak se može zaključiti da je ovaj okrugli sto bio vrlo uspješan, te da su na njemu dogovoreni principi, na kojima će se dalje razvijati partnerstvo. Također je dogovoreno da će svi u okviru svoje nadležnosti insistirati da se u propise koji se donose na svim nivoima, ugrađuju principi iz Konvencije. Jedan od zaključaka sa kojim su se usaglasili svi prisutni je da se posebnim zakonom treba urediti status, rad i finansiranje organizacija osoba sa invaliditetom. Ovaj zakon bi trebao obezbijediti veću stabilnost i održivost organizacija OSI u ovim veoma teškim društveno ekonomskim i političkim uvjetima.

c.) U drugoj polovini 2014.godine uspostavljeni su kontakti sa savezima slijepih država nastalih disolucijom Jugoslavije, s ciljem da se dogovori termin Konferencije i teme koje će se obrađivati, te da se potvrdi zainteresiranost saveza za učešće na Konferenciji. Šest saveza slijepih potvrdilo je interes za učešće na Konferenciji. Nakon provedenih priprema, što podrazumijeva slanje poziva, slanje materijala, provođenje procedure za odabir hotela, te provođenje drugih tehničkih procedura, Konferencija pod nazivom:“Međunarodna konferencija slijepih - Implementacija Konvencije o pravima osoba sa invaliditetom – sadašnje stanje i perspektive“. je održana od 27. – 29. novembra 2014.godine u Sarajevu. Na Konferenciji su učestvovali predstavnici 6 saveza slijepih iz regije i to: Bosne i Hercegovine, Republike Hrvatske, Srbije, Crne Gore, Makedonije i Kosova. U radu

Konferencije su učestvovali i predstavnici SRF Štokholm, predstavnici udruženja slijepih iz Kantona u Federaciji BiH i predstavnici MyRight.

Na svečanom otvaranju Konferencije prisustvovali su: predstavnici Federalnog ministarstva za rad i socijalnu politiku, koje je predvodio pomoćnik ministra za rad i socijalnu politiku i predstavnici Ministarstva za rad i socijalnu politiku Kantona Sarajevo, koje je predvodio ministar.

U radu Konferencije učestvovalo je oko 60 osoba.

Na Konferenciji su obrađene sljedeće teme:

-„Implementacija Konvencije o pravima osoba sa invaliditetom, sa posebnim fokusom na pitanja od interesa za slijepe osobe”

-”Profesionalna rehabilitacija i zapošljavanje slijepih osoba - pregled stanja u regiji”;

-„Tiflo-tehnička i druga pomagala, postojeće stanje u regiji, mogućnost zajedničkih aktivnosti”;

-”Status organizacija slijepih, podrška od strane države, dogovoriti oblike saradnje, naročito na zajedničkim projektima”

Na kraju Konferencije učesnici su usvojili zaključke, koji su dostavljeni učesnicima Konferencije.

Posebna grupa, koja je formirana na početku Konferencije, a činili su je predstavnici svih saveza, pripremila je Deklaraciju o položaju slijepih i njihovih organizacija u zemljama regije. Deklaracija je jednoglasno usvojena. Savezi slijepih će Deklaraciju dostaviti svojim vladama.

Dogovoreno je da ova Konferencija postane tradicionalna i da se svake godine održava u drugoj državi.

Prije početka rada Konferencije održana je pres konferencija za medije na kojoj su govorili organizatori, predstavnici saveza iz regije i predstavnici ministarstva.

Radu ove konferencije elektronski i printani mediji su posvetili značajnu pažnju.

d.) U skladu sa prihvaćenim Projektom je u Klubu slijepih povodom 15.oktobra – Međunarodnog dana slijepih , organizovano druženje slijepih, uz za tu prigodu, posebno pripremljen program.

U okviru druženja organizovano je predavanje na temu: „ Stres, načini prevazilaženja stresa ili njegove prevencije, sa posebnim fokusom na slijepe osobe“ . Predavanje je pripremila i održala prof.dr.Lidija Pehar – Zvačko.

Za ovo predavanje pokazano je veliko interesovanje od strane članova, a sa profesoricom je vođena duža diskusija po raznim konkretnim pitanjima.

Uz muzički program pripremljena je i tombola, koja je bila tako koncipirana da su slijepe osobe mogle dobiti samo neko od pomagala, kojima je raspolagalo Udruženje.

VII – ZADOVOLJAVANJE POTREBA IZ OBLASTI KULTURE, SPORTA, ŠAHA I REKREACIJE

U skladu sa Programom rada Udruženja organizovane su mnoge aktivnosti koje su imale za cilj povećanje interesa kod slijepih osoba za čitanje knjiga iz Biblioteke za slijepe i slabovidne u Bosni i Hercegovini. U vezi s tim u “Zvučnim novinama” su redovno objavljivane informacije koje dolaze iz Biblioteke. Udruženje je u skladu sa svojim mogućnostima obezbijevalo CD-playere i druga pomagala, koja su im potrebna za čitanje / slušanje knjiga udžbenika i drugih materijala koji su snimljeni u zvučnom formatu.

U toku 2014.godine članovi Udruženja slijepih su učestvovali na književnim večerima i drugim aktivnostima koje su organizovali Udruženje slijepih i Biblioteka za slijepa i slabovidna lica u BiH.

Takodjer su organizovane mnoge aktivnosti koje su imale za cilj resocijalizaciju slijepih osoba i njihovo uključivanje u aktivnosti koje organizuje Udruženje.

Redovno su organizovana druženja članova Udruženja u Klubu slijepih, uz muzičke i druge prigodne programe.

Udruženje je povodom odredjenih značajnih datuma i vjerskih blagdana organizovalo posebna druženja članova Udruženja, a za tu priliku je posebno pripreman prigodan program, kao što su 8. Mart, 15.oktobar, 3.decembar, Nova godina i vjerski blagdani.

Sport, šah i rekreacija slijepih organizovali su se preko Sportskog društva slijepih, koje je radilo i djelovalo u poslovnim prostorijama Udruženja.

Udruženje slijepih pružalo je pomoć Sportskom društvu, u granicama svojih mogućnosti, a Stručna služba Udruženja obavljala je sve stručne, administrativne i druge tehničke poslove za Društvo.

Sa zadovoljstvom se može konstatovati da je Sportsko društvo u 2014. godini postizalo značajne rezultate.

Sportsko društvo će Udruženju dostaviti informaciju o svom radu u 2014. godini.

VIII– SARADNJA UDRUŽENJA

Udruženje slijepih Kantona Sarajevo u toku 2014. godine ostvarilo je saradnju sa: Kantonom Sarajevo – Ministarstvom za rad, socijalnu politiku raseljena lica i izbjeglice, Ministarstvom saobraćaja, Kantonalnim centrom za socijalni rad i Službama za socijalni rad na nivou opština i pojedinim opštinama udruženim u Kanton Sarajevo, Gradonačelnikom i Gradskom upravom Grada Sarajevo, te sa mnogim drugim ustanovama i organizacijama koje su mogle pružiti pomoć Udruženju i njegovim članovima.

Posebno treba istaći da je u toku 2014.godine ostvarena dobra saradnja sa Federalnim ministarstvom za rad i socijalnu politiku.

Kao i prethodnih godina izuzetno dobra saradnja ostvarivana je sa Savezom slijepih Federacije BiH, Udruženjem slijepih građana BiH, Društvom za zapošljavanje slijepih osoba "TMP" i sa pojedinim kantonalnim udruženjima slijepih u Federaciji BiH i udruženjima slijepih u Republici Srpskoj.

Saradnja sa drugim invalidskim udruženjima ostvarivala se u direktnim kontaktima i preko Koordinacionog odbora udruženja osoba sa invaliditetom Kantona Sarajevo, te u okviru Nacionalnog programa MyRight kroz mrežu koalicija osoba sa invaliditetom i Federalnog programa za implementaciju Strategije za izjednačavanje mogućnosti za osobe sa invaliditetom, kroz pripremu i implementaciju lokalnih akcionih planova.

Saradnja sa Savezom slijepih Štokholm i Gotland Len je kao i do sada bila uspješna.

Tokom 2014.godine predstavnici Saveza slijepih Štokholm i Gotland Len su u više navrata posjetili Udruženje slijepih Kantona Sarajevo, s ciljem usaglašavanja aktivnosti vezanih za implementaciju postojećih projekata i razvoj projekata za period 2015 – 2017.godina.

Četveročlani projektni tim našeg Udruženja je u oktobru 2014.godine posjetio Savez slijepih Štokholm, s ciljem usaglašavanja finalne Aplikacije projekta za period 2015. – 2017.godina.

Udruženje su posjetili predstavnici mnogih humanitarnih organizacija i asocijacija, interesujući se za uslove u kojima žive slijepe osobe u Sarajevu.

Udruženje , je kao i do sada, ostvarilo dobru saradnju sa Informativnim centrom za osobe sa invaliditetom „IC.Lotos“ iz Tuzle, „IBHI“ BiH, Fondacijom za socijalno uključivanje, Udruženjem izbornih zvaničnika, Hesinškim parlamentom građana iz Banja Luke i drugim organizacijama.

Sa zadovoljstvom možemo naglasiti da je i u toku 2014.godine gospodin Kemal Kozarić iz Sarajeva , preko ovog Udruženja , za troje slijepe djece, koja pohađaju srednju školu , iz sopstvenih sredstava obezbijedio mjesečne stipendije u iznosu 150,00 KM.

Udruženje je u toku 2014 .godine učestvovalo u radu više neformalnih Koalicija čiji je cilj bio unapredjenje položaja osoba sa invaliditetom u Bosni i Hercegovini.

Predstavnici Udruženja su tokom godine učestvovali na više TV i radio emisija, u kojima se govorilo o radu Udruženja i problemima sa kojima se susreće Udruženje i njegovi članovi.

Saradnja sa sredstvima javnog informisanja bila je na zadovoljavajućem nivou. Tematika koja se odnosi na ovo udruženje i slijepe osobe, često je obradjivana u elektronskim i printanim medijima, što doprinosi opštoj afirmaciji ovog udruženja i njegovih članova.

IX- STVARANJE USLOVA ZA RAD UDRUŽENJA

U cilju poboljšanja uslova za rad Udruženja, a prije svega za rad organa, aktivista i Stručne službe, u toku 2014. godine posvećena je posebna pažnja investiciono-tehničkom održavanju poslovnog prostora, kao i nabavci određenih osnovnih sredstava kojima se unaprijedio rad Stručne službe.

U vezi s tim, u toku 2014. godine urađeno je:

- Izvršena je nabavka 2 kancelarijske stolice i 20 stolica za edukacioni centar.
- Također su kroz razne projekte kupovani neophodni kancelarijski materijali (kalkulatori, heftarice, toneri, papir, CD-ovi, material za uvezivanje i sl.)
- U okviru Projekta koji je realizovao Savez slijepih Federacije Udruženje je dobilo jedan telefax.
- Za radnike Stručne službe organizovane su potrebne edukacije, s ciljem da se unaprijede njihova znanja iz oblasti informacione tehnologije, pisanja projekata, zagovaranja i prikupljanja sredstava.

X – RAD ORGANA I STRUČNE SLUŽBE UDRUŽENJA

U toku 2014.godine u Udruženju su provedene značajne aktivnosti. Nastavljen je poseban angažman članova Upravnog odbora i ostalih aktivista Udruženja. Dvanaest osoba je imalo konkretna zaduženja, za provodjenje određenih programskih aktivnosti.

U toku 2014.godine održane su 2 sjednice Skupštine Udruženja, na kojima su raspravljani i usvojeni izvještaji o radu Udruženja u 2013.godini i programska akta Udruženja za 2015. godinu.

Skupština Udruženja na sjednici održanoj 15.decembra 2014.godine usvojila je novi Statut Udruženja.

Upravni odbor Udruženja održao je 7 sjednica, na kojima je raspravljao o svim pitanjima od interesa za Udruženje i njegove članove i donosio odluke, zaključke i preporuke iz svoje nadležnosti.

U 2014. godini u Stručnoj službi bilo je zaposleno 6 radnika.

Iako je obim aktivnosti u izvještajnom periodu bio izuzetno veliki, Stručna služba je sve poslove obavila kvalitetno i na vrijeme.

XI – FINANSIRANJE RADA I DJELOVANJA UDRUŽENJA

I pored velikih napora finansiranje Udruženja još uvijek nije sistemski riješeno. Kanton Sarajevo je iz svog Budžeta izdvajao samo dio sredstava za finansiranje Stručne službe i režijskih troškova. Treba naglasiti da se sredstva koja izdvaja Kanton svake godine

smanjuju, što pred Udruženje postavlja ozbiljan problem rješavanja finansiranja osnovnih troškova za rad i djelovanje Udruženja.

Dio sredstava obezbjeđivan je od prikupljene članarine, te iz projekata koji su realizovani u Udruženju slijepih. Nedostajuća sredstva obezbjeđivana su i od donatora i pomažućih članova, kojih je zbog postojeće situacije u Kantonu Sarajevo sve manje.

Bez obzira na navedene probleme Udruženje je u 2014.godini uspješno poslovalo što pokazuje Finansijski izvještaj Udruženja za 2014.godinu.

PREDSJEDNICA
UDRUŽENJA

/ Senija Okić /